

小

腆

紀

傳

小腆紀傳卷第五十七

前翰林院檢討加詹事府贊善銜六合徐鼎謨

列傳第五十

遺臣二

錢士升

高承璵錢嘉徵子

鈕應斗

朱治憫

吳

鈕

高斗樞

子宇泰

周元懋

從兄元初沈中柱

鄭龍采

林時對

陸寶

馮元颺

弟元颺沈崇瑜

補

熊明遇

李汝霖顏垓

易應昌

詹爾選范康生

蕭士偉

黃景昉

王觀光張利民

莊鼈獻

余颺楊瑞鳳

林衍培謝國瑄

王志道

張若化李瑞和

弟若仲

子士楷

林蘭友

唐顯悅林英

許環

盧若騰

郭貞一

沈佳期張瀛

楊期演 葉啓襄 林志遠
葉迎 諸葛倬 許吉環等

王忠孝 張正聲 蔡國光 劉子葵
王簡伯 陸昆亨 黃事忠

沈光文 姚翼明 程應璠 陳瑞龍 萬年英
辜朝薦 謝元忤 任穎眉 任廷貴

陳駿音 齊价人等 楊永言 張應星

錢士升字抑之嘉善人萬厯丙辰進士廷對第一授修撰以
母老乞歸趙南星魏大中萬燝之被璫禍也破產營護之以
是爲東林所推崇禎元年起少詹事掌南京翰林院旋謝病
歸四年起禮部右侍郎署尙書事六年九月召拜禮部尙書
兼東閣大學士時帝操切溫體仁以刻薄佐之士升撰四箴
以獻謂寬以御眾簡以臨下虛以宅心平以出政帝優旨報
聞而意不懌也無何有武生李璉請括江南富戶行首實籍

沒之法士升惡之擬旨下刑部帝不許士升謂此亂本也當以去就爭之抗疏極言帝報曰前疏已足沽名無庸汲汲士升遂乞休國變後七年乃卒

高承埏字寓公嘉興人屯田郎道素子也崇禎庚辰進士以父死非罪伏闕訟冤得贈故官知寶坻縣嘗固守抗

王師竟不賞亂後閉戶讀書有病中述志詩云惟將前進士慘淡表孤墳讀者比之澤畔行吟西臺慟哭云又同邑鈕應斗字宿夫崇禎癸未進士知漳浦縣有聲鼎革後里居杜門不出

錢嘉徵字孚于海鹽人天啓辛酉舉順天鄉試副榜崇禎改元嘉徵上書論魏忠賢十大罪或尼之嘉徵慨然曰虎狼食

人徒手亦可搏之舉朝不言而草莽言之以爲忠臣義士之倡雖死何憾自是言者繼起元惡就誅晚選松谿知縣閩亡卒於里著有松龕剩稿

朱治憫字子暇嘉興人天啓辛酉舉於鄉選肇慶通判歷同知丙戌十月永厯帝監國肇慶治憫與推戴上奔梧州擢爲兩廣總督守肇慶明年正月

王師自廣州乘勝下治憫棄城走終事不可詳而秀水朱彝尊書其詩後云子暇宣勞戎務一星卒殞天南生爲進表之劉琨死作思歸之溫序蓋亦粵臣之抗節以歿者

吳鉏字稽田初名祖錫字佩遠嘉興人父吏部文選郎昌時以罪死鉏素負大志而又欲雪其父之恥終身冥行不返家

園早年與妻弟徐枋往來靈巖支硎間既又同棲積翠嘗走海上依張煌言魯監國授爲職方郎中辛丑

王師入緬煌言遣鉏挾帛書入鄭陽山中說十三家軍使出師撓楚以援緬是時十三家已衰敝不敢出煌言軍亦尋散鉏乃北走中原間南歸則過徐枋之澗上草堂而不入其家鬱鬱竟死葬膠東以明蹈海之憤不願首邱云

高斗樞字象先鄞人崇禎戊辰進士授刑部主事坐議巡撫耿如杞獄與同列四人下獄尋復官進員外郎五年遷荊州知府久之擢長沙兵備副使時賊氛已逼臨藍湖湘間土寇蠭起長沙止老弱衛卒五百又遣二百戍攸縣城庫雉堞盡圯斗樞建飛樓四十大修守具臨藍賊艘二百餘由衡湘抵

城下相拒十餘日乃卻去尋擊殺亂賊劉高峯等撫定餘眾
詔錄其功巡撫陳睿謨大征臨藍寇斗樞當南面大小十餘
戰賊平詔資銀幣十四年六月進按察使撫治王永祚移斗
樞守鄖陽鄖被寇且十載居民才四千斗樞至甫六日而張
獻忠自陝而東斗樞與知府徐啓元遣遊擊王光恩及其弟
光興分扼之戰頻捷光恩故均州降渠小秦王也善用其下
斗樞亦善撫光恩闖賊先後四至皆大創去當是時湖南北
十四郡皆陷鄖獨存自十五年冬撫治王永祚被逮連命李
乾德郭景昌代之路絕不能至中朝謂鄖已陷十六年夏斗
樞上請兵疏始知鄖存眾議卽任斗樞而陳演與有隙乃擢
啓元右僉都御史撫治鄖陽加斗樞太僕少卿明年二月初

議設漢中巡撫兼督川北軍務擢斗樞右僉都御史以往路阻朝命皆不得達至三月始聞僕少之命卽以軍事付啓元七月北都變聞並聞漢中之命地已失不可往冬十二月命代何騰蛟巡撫湖廣又以鄖陽固守功加副都御史斗樞皆不聞也明年南都陷將之陝不可乃還鄖鄖亦降旁皇無之念老父尙在間道歸鄞與子宇泰與於江上之役累被名捕竟得脫後數年卒

宇泰字元發少負才名性尤忠篤乙酉偕錢肅樂起兵於鄞時斗樞猶未歸也魯監國手諭獎之以爲不愧浙東喬木授兵部武選司員外郎丙戌冬蠟書自海至爲邏者所得首被捕戊子翻城事洩再隨斗樞因繫壬寅復以海上事被逮在

月
獄終日鼓琴仁和令者亦倜儻士也以慮囚入聞琴聲而異
之及見其壁上所題詩曰先生休矣挽宇泰飲風波亭上固
辭令曰無傷也劇飲賦詩而別是後隔一日必至事解竟不
往謁嘗自序曰在昔里中諸名士大會於湖南華王其執牛
耳者而予以臥子先生所許濫竽其間國難以來華王得迫
隨范倪諸老遊於虞淵而予覲顏視息雖鍵戶屏絕人事然
以視亡友則可恥也志趣不齊苑枯隨之向之同社半已出
山攘攘如也咸瀄面目守之亦希不可悼哉所著有雪交亭
集取張肯堂舟山寓亭以名也諸父斗權字辰四斗魁字旦
中皆遺民之苦節者并斗樞父子時人稱爲四高公云
周元懋字柱礎一字德林鄞縣人尙書應賓之從子也以應

賁蔭累官南京右軍都事屯部郎中出知貴州調思南丁內
艱未赴而國難作浙東建國服未闕錢肅樂屢招之辭不出
而破家輸餉弗少吝丙戌六月家人自江上告失守乃慟哭
自沈於水救之甦卽削髮入灌頂山中性故善飲至是益飲
無度又不喜獨酌初呼山僧強斟之夜以達旦山僧爲所苦
遂避匿則呼樵者強斟之樵者以日暮長跪乞去則斟其侍
者侍者醉而仆乃呼月月落乃呼雲灌頂去所居百里酒不
時至又以深山覓酒伴不易始返其城西枝隱軒每晨起卽
呼子弟飲子弟去則更覓他人已而積飲成病或以無子勸
少飲有長者規之曰卽君不思養身待時邪乃瞿然不飲出
三日則縱飲如初然雖以酒困凡江湖俠客之有事投止者

雖甚醉蹶然起接無失詞傾所有以輸之因是家盡喪旋得嘔血疾不止卒年四十妻俞氏亦自毀繼之死

元初字自一嗣叔父應寶爲後讓任子於同祖兄弟元登元懋時人賢之與同里華夏王家勤陸宇燭以忠孝相期乙酉從錢肅樂起兵授部郎不受以白衣參軍事江上潰走山中惟歲時以省墓歸家本素封輸餉蕩其十五戊子力救華王五君子之難又蕩其十三旣又與島上通消息遂盡散其質脫粟草履晏然也嘗寫捫蝨圖見志歎曰今之江左并桓元子亦不可得年八十餘卒於家元登官刑部郎亦以苦節死沈中柱字石臣平湖人崇禎庚辰進士官吉水知縣國變後爲僧名行然號無淨往來靈隱金粟間有懷木菴詩草

鄭龍采字聖昭歸安人天啓辛酉舉於鄉出宰婺源過湖南謁巡撫何騰蛟欲留爲監紀辭曰朝廷命某宰婺源不命參公軍事也及解組歸騰蛟已徇難乃祝髮入山以終

林時對字殿颺學者稱爲兩菴先生鄞人崇禎己卯庚辰連薦成進士時年十八授行人司行人少執經倪元璐門下常熟錢謙益聞其名招致之不往於同官最與劉中藻陸培沈宸荃相暱或曰冷官索莫何以自遣曰苟不愛錢原無熱地丁憂歸里錢肅樂一見契之宏光時召爲吏科都給事中疏言史可法之軍江北所以藩衛江南者也不當使之掣肘進戰退守當假便宜左都御史劉宗周四朝老臣天下山斗當置左右翰林檢討方以智忠孝世家間關南來不當誣以傳

會之說並留中不下是時臺省混沓邪黨過半獨掌科熊汝霖掌道章正宸清望謬謬顧皆引之爲助阮大鍼深惡之乃嗾方國安以東林遺孽糾之遂與同里沈履祥偕去江上之役熊錢諸督師交章薦乃起佐其房師孫嘉績幕上封事每遭阻格中樞余煌輒歎息以不能力持爲愧時對力主渡江議汝霖之下海甯實力贊之進太常卿累遷右副都御史江千師潰監國遜去慟哭棄冠服轉徙山海間久之而年未四十也博訪國難事上自巨公元老下至老兵遐卒隨所聞見折衷而論定之曰繭菴逸史曰詩史當事薦之以病辭有同年生來訪以出處答曰此事甯容商諸人邪吾志自定爲君謀甯有殊同年愧其言而止未幾遺老凋落殆盡時對獨踰

大耄幅巾深衣躑躅行吟至莫可與語於是悵悵彌甚乃令小胥舁簋繼遍行坊市一日湖上演劇遠望場間有冕旒而前者或曰此流賊破京師也因狂號自簋繼撞身下踏地輦絕流血滿而伶人亦共流涕爲之罷劇嗣是不復出拚闕咄咄而已及卒遺命柳棺布衣不許以狀聞

陸寶字敬身鄞人以太學生高等授中書舍人崇禎時請以邊事自効詔書褒答侍郎劉之綸出師寶戒以莫浪戰之綸不能用而敗尋以終養歸里乙酉鄞義兵起傾家輸餉事敗遁去久之歸當事欲延爲鄉飲大賓辭不應所著悟香集倦倦於國事君讐頌言不諱故世莫得而見焉

馮元颺字爾賡元颺字爾崧慈谿人天啓辛酉兄弟同舉於

鄉明年元颺成進士崇禎戊辰元颺成進士時稱二馮中官張彝憲之總理戶工二部也元颺官都水主事抗疏謂內臣當別立公署不當踞二部堂時元颺亦由知縣入爲戶科給事中疏論中官出鎮之非先後忤旨乞假歸元颺尋起主事歷官蘇松兵備參議捕太湖盜置都御史唐世濟族子於法太倉人陸文聲之訐鄉官張溥張采倡復社也元颺力救之而元颺亦疏詆周延儒王應熊溫體仁薦黃道周宜直講東宮故兄弟直聲大著元颺以右僉都御史巡撫天津十七年春流賊日逼元颺留漕艘三百於直沽口密疏請帝南遷事不果行旣聞京師失陷聚將士泣血誓勿二而兵備道原毓宗已內叛劫元颺迎賊元颺不屈由海道脫身南歸元颺官

兵部尙書孫傳庭之治兵關中也廷臣多主速戰元颺謂宜致賊而不宜致於賊於帝前爭之曰請下臣獄俟戰而勝斬臣謝之貽書傳庭戒毋輕鬪白高兩將不可任已而傳庭果敗元颺知事不可爲以病乞休薦李邦華史可法自代帝不用而用張縉彥都城遂不守帝刑威御下內而樞部外而疆臣多被罪惟二馮以恩遇終元颺疾賜宮參元颺解樞部賜瓜果食物遣醫診視元颺智而謫初疏詆周延儒延儒旣相而復善之熊開元欲盡發延儒罪元颺沮之開元遂獲重譴眾論以此少之宏光時兄弟相繼病歿其家請卹給事中吳适言元颺身膺特簡莫展一籌予以祭葬是誤國之臣生死皆得志也部議卒如所請行

補

沈崇埜字宇昆慈谿人大學士宸荃之族弟也崇禎癸未進士授金壇知縣其父手書忠君愛國勿玷清白家聲十字付之魯王監國擢兵部主事江上破棄官躬耕於野有同年生王爾祿爲我巡海道屏車騎至海濱訪之崇埜稱病不起爾祿徘徊門外久之乃長歎而去補

熊明遇字良孺進賢人萬厯辛丑進士由知縣擢兵科給事中進八憂五漸三無疏極陳時弊見明史本傳厯擢南京右僉都御史提督操江魏忠賢以其疏救御史游士任也矯旨革職坐汪文言獄追贓謫戍崇禎初起兵部右侍郎明年進南京刑部尙書召拜兵部尙書言秦中流寇明旨許撫勦並行臣謂渠魁乞降亦宜撫脅從負固亦宜勦帝納之明年以

過信山東巡撫余大成言撫叛將李九成致萊城被圍又曲庇宣府議和巡撫沈榮命解任久之起南京兵部尙書改工部引疾歸國變後卒於家

李汝璈字用章南昌人崇禎時官兵科給事中十年閏月因旱求言疏言八九年來干和召災始於端揆積於四海水旱盜賊何怪其然帝怒削籍國變衰經北面哀號作祈死文竟死

顏垓字宇肩德化人天啓中進士知平湖縣有聲召對稱旨擢翰林院檢討轉右春坊海升學士明亡不仕

易應昌字瑞芝臨川人萬曆癸丑進士天啓時由御史累遷大理少卿閹黨劾爲東林削籍崇禎二年起左僉都御史進

左副都御史偕都御史曹于汴持史塋高捷起官事甚力尋以救刑部尙書喬允升忤旨遣戍宏光時召復故官遷工部右侍郎阮大鍼列之十八羅漢中國變後卒

詹爾選字思吉撫州樂安人崇禎辛未進士由太常博士擢御史請起用侍郎陳子壯推官湯開遠已因劾陳啓新并劾吏部尙書謝陞大學士溫體仁不加駁正尸素可愧未幾大學士錢士升以爭武生李璡搜括富戶之請忤旨乞休爾選言人臣所以不肯言者其源在不肯去耳輔臣肯言肯去臣實榮之獨不能不爲朝廷惜也語多切至帝震怒召對詰責爾選侃侃不少屈命錦衣提下爾選叩頭曰臣死不足惜皇上幸聽臣事尙可爲卽不聽亦可留爲他日思帝愈怒大臣

力爲申救僅削籍歸十五年給事中沈迅左懋第相繼論薦
召還未赴而都城陷宏光立首起之羣小憚其鯁直令補外
僚遂不出國變後又十二年而終

蕭士瑋字伯玉泰和人中萬厯丙辰鄉試越七年天啓壬戌
成進士除行人厯吏部郎中宏光時擢光祿寺卿著有春浮
園集

范康生字詡軒安福人官中書舍人從萬元吉於阜口隨入
贛州城陷被執放歸著倣指南錄紀贛事甚悉

黃景昉字太穉晉江人天啓乙丑進士由庶吉士厯官庶子
崇禎十一年御經筵問用人之道景昉言考選不公推官成
勇朱天麟廉能素著不得預清華選又言鄭三俊不當久繫

帝皆嘉納進少詹事嘗召對言近撤監視中官高起潛關外
輒聞警報臣家海濱將吏每遇調發卽報海警冀得復留觸
類而推其情自見帝領之十四年以詹事掌翰林院十五年
六月與蔣德璟吳姓並進東閣大學士明年並加太子太保
改戶部尙書文淵閣帝欲裁去南京操江文臣專任誠意伯
劉孔昭持不可忤旨遂引歸隆武時召入直復告歸國變後
家居十數年始卒

王觀光字子開晉江人天啓中進士知舒城縣有聲遷刑部
主事富商吳某家奴擁貲數十萬投魏璫門反噬其主璫敗
繫獄賄求脫卒擬決輿論快之出知常州府革織造輸知府
歲例八千金宜興魯較肆亂計擒誅之尋引疾歸以薦起補

荊州府惠藩承奉某虐於民愬者盈篋觀光謂爭之不如化之密緘送閩某大慄愧夜出數千人歡聲如雷荆故流賊出入處觀光捐橐中金築沙市關城延袤三十里雜民兵吹笛揚幟奸細來則殲之賊不敢犯楊嗣昌督師駐荆襄觀光請令其兵自饋嗣昌銜之以計典去士民號泣惠藩疏保留尋以積勞乞休隆武時起戶部右侍郎兼吏禮兵三部事未幾歸

莊鼐獻字任公晉江人崇禎癸酉進士由庶吉士改兵科給事中論東廠之害忤旨貶浙江按察司照磨宏光時復原官久之卒

余颺字廣之莆田人崇禎丁丑進士其制義與同年夏允彝

陳子龍齊名知宣城縣分校鄉闈所取士如王亦臨方以智
俱知名士宏光時擢吏部文選司未幾歸杜門不出丁亥魯
監國召爲左都御史亦不赴著有蘆中詩文集蘆蠅史論識
小錄

林衍培字仲卿莆田人以貢生知興國縣興爲吉贛門戶土
寇閭總之亂衍培練義勇自將之屢挫賊鋒邑恃以無恐尋
以母老歸養屢徵不起生平言笑不苟終日危坐年六十二
卒

張利民字能因侯官人崇禎庚辰進士知桐城縣值獻賊再
攻城利民集將士執所佩刀殺白雞以血灑地曰諸公有二
心者彼視又折矢誓曰利民今日藉諸公力堅守有切不以

上聞者有如此矢將士感泣賊百計攻之不克會黃得功來
援遂解去在邑三年治行推天下第一擢戶科給事中
國變後披緇入山自稱田中和尙有野衲詩略

李躍龍字鱗伯福安諸生劉中藻之妹夫也隆武時授兵科
掌印給事中偕中藻攻福甯州州民閉門拒守躍龍單騎至
城下諭以勤王大義民開門迎降後卒於天台之紫微宮子
先春字茂初亦諸生授監紀理刑有志節

楊瑞鳳字和仲仙遊人崇禎中以武進士官遊擊國變後退
居陽谷山寇郭爾隆竊發瑞鳳親冒矢石凡十一戰始解鄉
里獲全天下旣平竟不仕

謝國煊字進寶歸化人偉軀幹有膂力官御營前軍都督明

亡杜門不出有大明宮殿鎖烟霞荆棘銅駝淚一車之句鬱鬱死

王志道漳浦人崇禎中官副都御史六年正月中官王坤詆修撰陳于泰侵及首輔周延儒廷臣以內臣輕議朝政爭之帝不憚志道劾坤語尤切帝責令回奏奏上召對平臺詰責者久之竟削籍志道初以議三案爲高攀龍所駁謝病歸魏忠賢以其非東林也擢左通政論者薄之至是竟以忤中官罷宏光時擢戶部右侍郎阮大鍼列之七十二菩薩中終事不可詳

張若化字兩玉漳浦人崇禎丙子舉於鄉弟若仲字聲玉庚辰進士官益府長史若化爲黃道周弟子道周之下詔獄也

若化微服入獄左右之隆武時微拜御史閤亡兄弟遐隱丹
山蕙衣竹冠往來島上時鄭氏據臺廈以恢復爲名同里進
士倪俊明等俱署官職及鄭經西渡據漳州遣其親信馮錫
範齎幣聘若化兄弟固辭不出山居數十年以壽終若化子
士楷字端卿工詩古文詞若化兄弟之偕隱丹山也士楷方
弱冠自以先代遺臣子杜門屏舉業潛心性命以主敬爲根
本論者方之漢汝南黃憲云

李瑞和字寶弓漳浦人崇禎中進士官松江推官訟獄多平
反松江人塑像生祀之尋擢御史視鹺兩浙丁艱歸家居四
十四載竟不出黃道周爲序其牆東集國變後十二年而卒
林蘭友字翰荃號自芳仙遊人崇禎辛未進士知臨桂縣宗

室貴戚爲歛迹行取南京御史連疏劾輔臣張至發薛國觀
家臣田維嘉樞臣楊嗣昌負國之罪忤旨禍且不測詹事黃
道周翰林劉同升趙士春給事中何楷交章論救謫浙江按
察司照磨時稱長安五諫久之起考功員外郎北都陷賊累
繫羣臣令降者立紅幟下不降者立青幟下蘭友竟立青幟
下賊暴之烈日中有道士投以濡帕嚙之得不死隆武時起
太僕少卿晉兵部尙書右副都御史督師泉漳閩亡奉老親
遁之廈門羈窮飄泊凡十五載卒

唐顯悅字子安仙遊人天啓壬戌進士崇禎時知襄陽府遷
下江兵備副使守麻城有功尋被劾歸起蒼梧道轉嶺南巡
道丁母憂歸隆武帝召爲右通政以兵部右侍郎致仕全家

渡廈門朱成功子經之妻唐氏顯悅女孫也而不禮於經顯悅銜之經亂弟之乳母陳氏而生子詭以妻出報顯悅致書成功謂乳母居八母之一狎而生子家不正何以治國成功怒欲誅經令不行遂憤懣成疾卒而顯悅竟以壽終

許璟字得璟莆田人崇禎戊辰進士由南昌推官歷升湖廣參議平寇有功明亡依朱成功卒於廈門

林英字雲又福清人崇禎中以歲貢知昆明縣有神明稱永歷時官兵部司務明亡祝髮爲僧由滇遁入臺灣卒

盧若騰字閑之同安人崇禎庚辰進士授兵部主事晉郎中兼總京衛武學三上疏劾定西侯蔣惟祿出爲甯紹兵備道與利革弊兩郡有盧菩薩之謠宏光時擢右僉都御史巡撫

廬鳳未行南都亡隆武帝命爲浙東巡撫駐温州旋進兵部
尙書督師踰年閏又亡遂從魯監國於浙東鄭彩之殺熊汝
霖也眾莫敢言若騰巾揭聲其罪後依朱成功於安平成功
待以上賓迹跡澎湖辛卯三月病劇大呼先皇帝而卒補

郭貞一字元侯同安人崇禎庚辰進士行取御史巡按浙東
宏光時擢右都御史內監不遵朝班疏糾之宦侍屏息謂貞
允彝陳子龍徐石麒徐汧沈延嘉葉廷秀熊開元等具忠君
愛國之誠乞召用憲長王夢錫以賄遷官選郎劉應賓黷貨
乞正罪一時風采凜然丙戌後歸隱廈門尋渡臺灣卒

沈佺期字雲又南安人崇禎癸未進士授吏部郎中隆武時
擢右副都御史閩亡隨朱成功起兵泉州之桃花山晚入臺

濤以醫藥濟人壬戌卒

張灝字爲三萬厯戊午舉人瀛字治五崇禎壬午舉人籍隸同安巡撫廷拱子也隆武時灝官職方郎中瀛官兵部司務閩敗兄弟遁跡廈門庚申渡臺濤明年瀛卒年八十四癸亥王師平臺濤年九十五矣施琅送之歸舟至澎湖卒

楊期演字則龍自金門移居廈門博學工古文詞崇禎庚午舉人閩中召爲兵部主事汀州之變追扈不及辛丑以後僧帽道帔杜門不出每春秋佳日陟山巔北望酹酒哭拜聞者憐之著有易經管見島上紀事子秉機邑庠生亦削髮爲僧遊兩京岱岳蒼茫憑弔一託於詩旣以行路艱難乃變姓名南歸著有浩然小草

葉啓蕤字景芝廈門人吏部主事翼雲姪也幼穎慧力學隆武丙戌與臺灣張金棕劉顯襄同領鄉薦攝漳州通判閩亡從翼雲倡義同安城破遁跡蓮邨十六載居恆鬱鬱語家國事輒嗚嗚哭不止康熙癸卯鄭氏亡啓蕤齋志以歿

林志遠字致子廈門人崇禎癸未進士授工部主事假歸甲申後奉母結茅清溪仙峰嶺不復出著有歷代史白又葉迎字允受亦廈門人結髮從戎以勇略累官總兵鼎革後杜門不出春一笠秋一綸徜徉海上以終

諸葛倬字士年晉江貢生隆武時以薦授翰林院待詔加御史監鄭鴻達軍出浙東閩亡依朱成功於廈門永歷帝進光祿寺卿有降臣某書招之謂幡然肯來監司可立致且怵以

危語倬復書謂聖主隆唐虞之德小臣守箕山之操代有其人新朝政尙寬大須彌大千何問微塵必欲相強便當剗胸著地勿問是肝是肉矣某得書惘然而罷後卒於臺灣

許吉燦晉江人崇禎癸未進士山知縣擢刑部主事鼎革後隱廈門以終同時在廈者林其昌己卯舉人黃維璟潘廣鍾壬午舉人馮澄世隆武丙戌舉人俱泉州人廣鍾字道宣澄世字亨臣事詳延平春秋

王忠孝字長孺號愧兩惠安人崇禎戊辰進士授戶部主事轉薊州餉忤內監鄭希詔緹騎逮治故事緹騎所至不饜慾則楚毒隨之忠孝不能具一餐校以其廉且冤之京師相傳爲異事入獄詞不撓廷杖遣戍御史王志道疏救得釋宏光

時授紹興知府隆武帝擢光祿寺少卿遷左副都御史閩亡
依朱成功於廈門永厯帝命以兵部左侍郎兼太常寺卿疏
辭不許道阻不能赴

王師克廈門復徙臺灣卒

張正聲字長正惠安人蔡國光字士觀金門人同中崇禎甲
戌進士正聲以推官厯陞職方郎中國光以鉅鹿知縣召對
稱旨擢禮科給事中北都之變皆被賊拷掠乘間南歸正聲
散財起義不克先後渡海入廈門以終

劉子葵惠安人惠安義師之役子葵襄其事官索之急削髮
入廈門爲僧復謁永厯帝於肇慶擢龍川知縣總兵黃應杰
叛子葵扼關使不得北向惠屬諸邑賴以全標將某讒之巡

撫子葵曰吾爲國耳豈戀一官哉卽日解組去與王簡伯逝
潮之深山久之復至廈門簡伯撫州人子葵之樹幟龍川也
簡伯以兵部職方奉命過其邑河源師潰自刎不殊乃與子
葵往來閩粵間將之桂林途遇寇死

陸昆亨不知何許人官錦衣衛扈隆武帝西行汀州之變奔
廈門爲僧年八十有奇

黃事忠字臣以不知何許人官兵部職方司嘗崎嶇閩粵起
義兵母妻被殺避居廈門戊戌冬偕御史徐孚遠都督張自
新奉使赴滇失道安南與國王爭禮後西旋不知所終

沈光文字文開號斯菴鄞人以明經入貢乙酉豫晝江之師
魯監國授太常博士己從至長垣進工部郎軍潰扈監國不

及走肇慶永厯帝擢太常寺卿辛卯兩粵再覆由潮陽至金門我閩督李率泰招之焚其書返其幣將航海居泉之海口颶風失維飄至臺灣時臺灣猶爲荷蘭地從之受一壓及延平王朱成功至知光文故在喜甚以客禮見致佩撥田宅贍之成功卒子經嗣立頗改父政諷以詩幾得禍因逸至羅漢門爲僧授徒自給不足則濟以醫歎曰吾二十年飄零絕島棄墳墓不顧者祇欲完髮以見先帝而卒不克其命也夫癸丑臺灣初附我總督姚啓聖貽書曰管甯無恙邪尋卒於諸羅光文居臺三十年蓋及見延平三世之盛衰云所著有臺灣賦東海賦槎賦桐花芳草賦草木雜記

姚翼明字興公浙江人官兵科給事中明亡起義海昌事敗

遁己從魯監國乘槎至廈門僦居東嶽廟爨火屢空充然自得旋入洪濟寺爲僧著有南行草

程應璠浙江人陳瑞龍湖廣人並以武進士歷官都督浮海至廈門與徐孚遠諸人遊紀許國詩云勲追盛世麒麟閣人是深山布褐翁瑞龍卒於廈

萬年英字靜齋黃州人官台州通判隆武帝登極詔至魯諸臣不用命年英獨言此時不宜異議上聞而嘉之擢兵部主事閩亡遁跡廈門永歷帝召授故官癸巳復奉命至島與徐孚遠紀文疇遊後不知所終

辜朝薦字在公潮州人崇禎戊辰進士授安慶推官晉兵科給事中與郭之奇羅黃傑黃奇遇號爲四駿明亡依朱成功

於金廈後渡臺灣卒或曰朝薦在粵與何吾駟爭事權有隙
丙戌李成棟以

王師入廣州實朝薦導之既成棟歸明朝薦懼事洩走歸島
云

謝元忭字途野潮州人崇禎癸未進士永厯時官兵科給事
中後祝髮於廈門爲僧

任穎眉不知何處人魯監國時以職方郎中監督師熊汝霖
軍從監國航海定西侯張名振嘗舟過昌國衛守城兵以礮
擊之中名振臥牀名振大怒曰叛軍無禮乃爾邪襲破之擄
城中婦女二百八十有奇將賞給南田軍士穎眉自舟山至
具以告穎眉力爭之竟日與名振大競僚佐勸止之明晨名

振迎入帳抗論如前乃禮謝之婦女得放還辛卯八月舟山陷突圍得脫從監國終於廈門

任廷貴不知何處人以太常寺卿從魯監國於舟山辛卯八月

王師逼舟山監國航海廷貴又從焉自廈門奉命北上舟覆北茭洋以僧遜貽絕命詩曰還將不二證西歸未遂黃冠卽衲衣力任四千餘載重癡擔六十七年非翩翩野鶴隨雲適點點寒梅鬪雪霏夢破瞿然成大覺澄潭明月自相依

陳駿音不知何許人黃道周弟子隆武時官中書舍人道周師次明堂里自忖必敗出所著書畀駿音間道持歸偶客邸火燼焉每語及輒哭閩亡依鄭氏於廈門授吏官都事鄭經

之與耿精忠敗盟也駿音謂驟兩國之好失同讎之義致前
門拒虎者恢心雍髮悔何可追今惟遣將倍道出邵武攻南
台親統六師臨江督戰庶可冀成効若優遊歲月恐禍不遠
矣馮錫範詆爲老悖出爲銅山安撫司鄭氏亡駿音遁粵之
韓江年八十餘卒又有齊价人洪七峯駱亦至吳亦菴劉玉
龍五人者其詳不可聞明季遺老之避地臺厦兩島者也亦
至著有島史亦菴江右人嘗官兵部寓居醉仙巖以終
楊永言字岑立昆明人崇禎癸未進士官崑山知縣嘗應南
都詔薦諸生顧炎武於朝會

王師南下永言棄官逃已復與炎武及參將陳宏勳諸生歸
莊吳其沆等起兵拒守事敗入黃浦依吳志葵志葵敗祝髮

爲僧名巖雲入中峰旋入金華晚卒於滇

張應星雲南恩貢生習識緯工劍術官知州以軍功擢部郎
隆武建號齋詔賜沐天波過汀州歸化知縣華廷獻留之宴
忽報峒賊將至應星曰我雖過客而眷屬在城義無遑避禍
福與君共之集紳士憑血神前登陴望賊陣曰此名赤腳城
如馬足裹鐵履山坂如平地吾識此符呪破之立解賊造天
車如方柵容四十餘人數人推而前高與城齊應星以衝木
破之相持數晝夜城賴以全

男承憲編輯

仁和魏錫曾參校
會稽梁繼元覆校

小腆紀傳卷第五十七終

小腆紀傳卷第五十八

前翰林院檢討加詹事府贊善銜六合徐鼎

列傳第五十一

逸民

徐逸度

黃周星

王滿鍾張

昭卓爾堪

徐枋

周茂蘭

紀映鍾

陸璉

徐晨

陳三島

包捷

吳宗潛

韓洽

葉襄

歸莊

顧蘭服

鍾曉

楊彝

毛晉

陸慶臻

王光承

紙衣翁

沈壽民

補

采薇子

趙士喆

趙士完

張光啓

崔子忠

董樵

一壺先生

吳道行兄道升子敬

郭金臺蔣之葵朱之宣瞿龍躍李國相郭履驪劉象賢

陳三績鄧林材陸圻

汪風補施相徐繼恩

巢鳴盛譚貞良褚連時吳統持沈起

李標王翊馮延年俞汝言蔣之翹

周之濬張應鰲董錫趙甸張應煜

戴易張宗觀陳洪綬

邵以貫呂章成周容楊秉紘

周西范路駱國挺朱金芝

林法曾燦恆楊維熊陳發曾蔡又新

陳名賓何其偉王廣

鄭

郊

弟劉堯章

鄭

邵

朱國漢

丁之賢

阮文錫

林顯謨

葉后詔

洪承駿

涂伯案

弟仲吉

李茂春

洪思

王仍輅

邱義

黃驥陞

林邁佳

陳國臚

徐逸度以字稱中山王達之裔國變後棄家挾崑山李氏子
 同竄呼以伯仲遂姓李以來南故遂名南世或有言李南詩
 者非真姓名也隱於杭東郭之艮山賣藥自給所交惟逸民
 徐堅石施蕙農數人疾革時子嘉錫跪牀下請宗姓及名曠
 目叱之終不言故子若孫終不知氏之所自卒年八十有五
 其爲詩歌多可嗟可泣語率不存存者惟楚歸吟邨居漫興
 二卷前後梅花二百詠而已

黃周星字景虞一字九煙本湘潭周氏子幼爲金陵黃氏撫養遂冒其姓爲黃周星成崇禎庚辰進士除戶科給事中不就性狷介詩文奇偉國變後變姓名爲黃人字略似僑寓湖州寒暑不易衣冠年七十自撰墓志作解脫吟十二章縱飲酒一斗大醉沈南潯河死

王潢字元倬上元人崇禎丙子舉人戶部郎中倪嘉慶薦於朝潢念世亂親老賦南陔詩以見志不就嘗與顧炎武同詣孝陵炎武稱其詩深婉和摯不失三百篇溫柔敦厚之旨又江甯貢生顧與治字夢游上元紀映鍾字伯紫皆逸民中以詩名者

張紹字力臣淮安山陽人父致中爲復社領袖尊經博古家

貧而儲金石文頗富昭承家學棄諸生不就試躬歷焦山水
澁手拓瘞鶴銘而考證之又入陝謁唐昭陵遍覽從葬諸王
公表碣潛階斷石必三復而聯絡之顧炎武開雕音學五書
於淮上昭與子叶增叶箕任校寫之役炎武嘗云精心六書
信而好古吾不如張力臣

卓爾堪字子任江都人建文時侍郎敬之孫選輯逸民詩朱
彝尊詩所云忠貞公後族蟬聯一代遺民藉爾傳也

萬壽祺字年少徐州人崇禎庚午舉人風流豪宕傾動一時
國變後僧冠僧服自名明志道人沙門慧壽飲酒食肉如故
顧炎武過山陽與定交焉

徐枋字昭法號俟齋長洲人故詹事汧之子崇禎壬午舉於

鄉痛父死國難與嘉善吳鉅避地靈巖支硎間久乃築澗上
草堂老焉書法孫過庭畫法巨然署曰秦餘山人終其身以
書畫自給足不入城市豢一驢甚馴能知人意有所需則以
書畫卷置一麗驢背上驢乃獨行至城立城閭問不闌出一
步市人見之咸謂高士驢至取其卷如所指備物而納諸麗
達官貴人訪之輒踰垣避去有所遺不受巡撫湯斌嘗屏從
騎徒步叩門者再卒不見往來者惟萊陽姜實節宣城沈壽
民崑山朱用純同里楊旡咎門弟子吳江潘耒及南嶽和尚
洪儲也洪儲每以香火資周所急曰此世外清淨物得獨留
所居當天平山麓平遠清勝讀書染翰之外竟日不出一語
與平湖李確嘉興巢鳴盛稱海內三高士年七十有三卒潘

未與山陰戴易葬之鄧尉之西真如塢而以淵上草堂爲之祠

周茂蘭字子佩吳縣人忠介順昌長子也順昌死闖禍崇禎帝卽位茂蘭刺血書詣闕訟冤詔以所贈官推及其祖父茂蘭更請給三世誥命建祠賜額悉報可且命先後慘死諸臣咸視此例茂蘭好學砥行不就蔭敘國變後隱居以壽終鄉人私謚曰端孝先生

金俊明字孝章吳縣諸生性和而介入復社才名藉甚崇禎壬午秋偶筮焦氏易林得蠱之艮愀然太息遂棄諸生亂後隱市廛間矮屋數椽藏書滿櫝門人私謚曰貞孝又陸璉字茂璩吳縣人兩中武科國變後祝髮蓮子峰下自號了緣道

人有楓江遺藁

徐晟字禎起一字損之長洲諸生以陶潛自比題其詩爲陶菴詩刪魏禧嘗稱爲吳門隱君子謂其詩頓挫沈鬱卽辭有未工必不稍有矯飾以自害其性情同時諸生徐樹丕字武子工八分書亂後屏居郊西布衣藿食泊如也著有埋菴集楊炤字明遠年少負高才遁跡不出妻子凍餒吟詠弗顧也韓洽字君望隱居羊山秀水朱彝尊極稱之謂所據篆學測解釋訓考源足證趙宦光說文長箋之謬葉襄字聖野與萊陽姜垓詩篇唱和力屏鍾譚邪說所刊吟藁今不傳陳三島字鶴客蓬戶席門求友若不及與魏耕張宗觀朱士稚等爲莫逆交孤憤露於詞色耕以海上事洩入獄死宗觀士稚等

亦不良於死三烏鬱鬱卒以上皆長洲人

包捷字驚幾吳江人崇禎壬午舉人性真摯孫兆奎之死也哭之內橋明年吳易死杭州收葬之隱居灌園以終有西山集同時諸生俞榮字受子谷隱嚴耕不入城市又吳宗潛宗漢宗泌兄弟九人隱居唱和所輯有驚隱篇歲寒集而顧有孝者字茂倫選刻百家詩行於世有齋菜孟嘗君之日晚號雪灘釣叟松陵女子沈關關刺繡作雪灘濯足圖過江人士至以不與題詞爲恨云以上皆吳江諸生

歸莊字元恭崑山諸生嘗舉崇禎庚辰特用榜博涉羣書工草隸與同里顧炎武學行相推許而不諧於俗有歸奇顧怪之目乙酉

王師下崑山與炎武同應前令楊永言義師之役事敗亡命去薙髮僧裝稱普明頭陀晚乃廬金潼里之祖塋側炎武奔走四方莊不出里閭而寓書相切劘炎武嘗言音韻必宗上古孔子亦未免有誤莊規之曰君學益博則僻益甚將不獨音韻爲然卻子語迂單子知其不免況加之以怪乎願抑賢知之過以就中庸也又勸炎武東歸云柳子厚竄南方恨其祖先曾不若馬醫夏畦之鬼得享歲時之祭君獨無邱墓之思乎其直諒誠款如此又顧蘭服字國馨於炎武爲從叔父行國變後棄諸生業醫永厯帝稱號粵中遣使授冠帶辭以疾不赴又有鍾曉者字人雅或曰醴厓不詳何處人崇禎末流寓崑山食鮮一飽而行吟不輟見聖牆輒以所作題壁窠

書人爭惡之夏日沈飲大醉溺水死

楊彝常熟人以歲貢官松江訓導擢知都昌縣道阻弗克赴
萬厯之季士子喜倡新說畔傳注彝與太倉顧夢麟力明先
儒之說天下翕然從風稱楊顧學鼎革後歸隱晚歲目盲猶
令人讀書其側講說無少倦年七十九卒同邑毛晉字子晉
隱居不赴試性好藏書自十三經十七史及詩詞曲本別集
稗官靡不鏤版公諸世今所謂汲古閣本也有野外詩卷
侯泓字研德後更名涵字中德嘉定諸生論文以孟子爲宗
論詩本之自得所作揚州秋懷七言律感懷故國情見乎詞
有掌亭集鄉人私謚曰貞憲先生

朱明德字不遠太倉人隱居爛溪之濱著句吳外史記鼎革

時事甚悉又諸生朱明鎬者字昭芑有甲申悲憤詩

張若義字吳東華亭人崇禎癸未進士甲申後灌園自給中表秀水朱彝尊嘗訪之郊外荷鋤帶笠相揖於田間破屋中下一榻以留吳處士騏

陸慶臻字集生金山衛人崇禎壬午舉人

國朝順治八年揀選推官不赴遊秦晉間晚始歸里貧甚泣曰得墓田一笏營葬足矣故又號笏田著有薺園詩稿又有王光承字介右弟烈字名世皆上海諸生亂後兄弟躬耕海畔有鎌山草堂詩集

謝遴字彙先宜興人崇禎癸酉舉人有亦是樓存彙鼎革後隱居種菜檢討陳維崧贈以詩曰半畝牛宮繞菜田鋤畦汲

水獨悠然芒屨一兩千金直不踏城中二十年

紙衣翁者面目略可辨行吳市中剪紙爲衣行則率率作響
口詣破廟中臥臥起於兩袖間出崇禎大錢一宏光隆武錢
二置之高所而載拜拜已始就食食亦不審其何所得識者
謂是南都閩疆之遺臣邪而姓氏竟弗傳

沈壽民字眉生宣城諸生修撰懋學之從孫也崇禎九年舉
賢良方正巡撫張國維以壽民應詔適楊嗣昌奪情起兵部
尚書抗疏劾之曰嗣昌起復業一年矣卽應躬歷戎行滅寇
朝食柰何安坐司馬之堂支吾朝夕使餉日以虧師或解體
雖屈首服丁汝襲之刑束身死王治之獄竟何益哉又疏云
嗣昌旣不能躬行戎間曲徇熊文燦主撫之說卽撫局果成

辱國損威已不可贖而況乎其未必也流寇蔓延七省肆毒
十年擅驚陵寢凡爲臣子疇弗痛心嗣昌統一十二萬之師
不爲不武運二百八十餘萬之餉不爲不充整旅以往何凶
弗摧俾賊力極勢窮面縛輿櫬而後昭上恩德以宥之夫如
是而撫可成也今者漫無翦治頓事姑容招之不來強而後
可講盟結約若與國然天下有授柄於賊而能制賊者乎毋
乃旣殲剿之功而復乖撫之術乎雖復遠寬三年之限更累
數年之民正恐盜賊無期主憂彌切臣不知所終矣通政使
張紹先以其言危切借字數溢額寢不上壽民書責之紹先
乃請上裁命勿進壽民復駁括兩疏上之留中少詹事黃道
周聞而歎曰此何等事在朝者不言而草野言之吾輩愧死

矣廷臣次第疏爭俱獲嚴譴要自壽民倡之故是時名震天下未幾移疾歸講學姑山從遊者數百人先是壽民疏中有阮大鍼妄陳條畫鼓煽豐芑語大鍼深銜之宏光時大鍼用事乃變姓名攜家走金華山中南都亡遂匿跡深山採藜藿以自食有知而餉之者皆峻卻曰士不窮無以見義不奇窮無以明操守郡守朱天錫致十金辭不獲度置壁中三年未嘗發視溧陽陳名夏雅善壽民既仕我

朝爲大學士將特疏薦之遣使寓書壽民不發函對使焚之答書曰龔勝謝枋得智非不若皋羽所南卒殞厥軀者由多此物色耳今之薦僕者直欲死僕也名夏乃止乙未始還里而足不履城市當事或邀之及半道望望然去乙卯五月卒

年六十九疾革命門人劉堯枝施閏章載筆曰以此心還天地此身還父母此學還孔孟語畢而瞑生平重然諾友人周梅骨死海外子幼壽民渡海葬之周鑣之歿也藐孤爲逋負所逼壽民鬻田以償與黃宗義交最篤別四十年矣臨歿爲書永訣去易簣十有三日耳學者私謚曰貞文先生所著有閑道錄補

采薇子者衣如懸鶉兩足重墜如漆往來績溪嶺北常宿路亭中拾枯枝掘野菜就沙罐爛煮食之食已復掘菜拾枝如故而未嘗向人乞一錢間入邨館中假童子楮筆題詩詩或可解不可解而字甚工題已歛歛誦歛歛哭尾輒署曰采薇子叩其姓氏卽流涕不答再叩之則哀號疾馳去顧每歲三

月旣望必僵臥地下者數日不飲不食不言笑好事者或蹴而呼之以食則又歔歔然哭不已人以是度其爲故明之有爵位而悼喪其君者

趙士喆字伯潛掖縣貢生倡山左大社與南中復社相應集義勇捍衛鄉里嘗削封事彙欲上之見陳啓新用事不果顛沛終老著有東山詩史陳濟生嘗謂忠愛懇切大類子美又趙士完字汝彥掖縣人崇禎壬午舉人亂後棄家而南棲廢寺中弟士冕官我

朝鎮江知府物色得之強之歸顧炎武與訂交焉

張光啓字元明章邱諸生亂後足不履城市年八十餘卒王士禎爲刪存其詩又長山劉孔懷號果菴顧炎武嘗主其家

與之辨析疑義所著有四書五經字微詩經辨韻諸書
崔子忠一名丹字道母又字青蚓萊陽人寄籍爲宛平諸生
畫與陳洪綬齊名世所稱南陳北崔也嘗爲尙書華亭董其
昌所許顧自矜貴雖貧甚而不以金帛動友人官吏部者念
之屬選人具金爲壽子忠怒投之地曰念我貧當分俸餉我
乃以此外來物汙我邪史可法故與子忠善偶詣其舍見方
絕食脫乘馬曰聊佐一夕衛逕徒步歸於是子忠牽馬入市
得金呼友噉飲之曰此酒自史道鄰來非盜泉也凡飲一日
而金盡絕食如故亂後南奔鬱鬱不自得有世俗子拂其意
遜入土室中匿不出南都覆後以餓死

董樵字亦樵萊陽諸生國變後徙居文登海濱日荷薪入市

易米人莫知其住處有紳士要於路欲與語樵棄薪道左詭云吾科頭當取冠與公揖竟去不來紳士取棄薪以歸曰此高士所遺也樵從此不復入市矣

一壺先生者不知其爲何如人往來登萊間角巾破衣好飲酒行輒以酒一壺籠袖中人呼一壺先生好事者嚙以酒卽留宿其家間一讀書卽欬歔流涕往往不竟讀雖黑夜亦踰踰走或宿野人家或寄僧寺不久輒去去復罔知所之與卽墨黃生萊陽李生者善每與兩生相對瞪目無語旣而曰行酒來吾爲汝痛飲兩生嘗從容叩之勿答卽舍去去之數歲忽再至仍居僧寺容貌憔悴神氣恟忪中夜放聲哭閱數日竟雉經死年垂七十矣兩生者爲之殯而歲以一壺酒澆其

士

吳道行字見可善化人六七歲聞長老談嶽麓先賢講學輒肅然傾聽爲諸生家貧授徒時新建惜陰書院當事聘爲山長人稱嶠山先生國變後鬱鬱不自得一日趨吉藩故邸望闕痛哭輿歸山中不食卒著有嶠山集易說讀史闕疑嶽麓志兄道升性篤孝友亦以嗜學稱子愉愉見周二南傳愷字去慵鼎革後棄諸生率妻子躬耕長松里屢徵不起有方月斯者佚其名穀城人輔臣岳貢之子甲申後賣卜吳門

郭金臺湘潭人字幼隗本姓陳氏遭家難冒姓郭中崇禎己卯壬辰副榜會舉行積分法朝士屢以名薦不赴例授官亦不就中隆武丙戌舉人貌奇偉議論風生流賊陷湖南請於

督師何騰蛟練鄉勇爲守禦計既知時不可爲乃隱衡山絕口不談世事騰蛟以職方郎中薦再起監司僉事皆以母老辭臨終白題其碣曰遺民郭金臺之墓

蔣之蔡字天植湘陰人有羅江才子之目與同郡趙金臺齊名性豪邁以澄清天下爲己任甲申後崎嶇戎馬以卒又朱之宣字子昭湘陰人鼎革後隱於樵自號砍柴行者戊子之役楚義師蜂起收復後當事因之成大獄湖湘名士株連者三百餘人之宣與焉獄數年始解

王二南字放叟茶陵貢生以不薙髮被逮絕食七日不死洪承疇疏救之得放還有勸之再出者輒掩耳而走

瞿龍躍字天門武陵人崇禎時拔貢鼎革後出亡不歸所至

題詩石壁上納稿瓢中號一杓行腳道人

李國相字敬公原籍富平隨都督劉綎平陽應龍赴部聽敕
下三峽舟覆負母出巨浪中功牒漂失遂浪跡衡湘間崇禎
壬午以衡陽籍舉於鄉衡州陷獻賊脅以僞職國相引刀割
兩臂示不可用得免鼎革後轉徙山谷歲更其處晚築小室
植桃數株稱桃塢老人又衡陽郭履躋字季林湘鄉劉象賢
字若啓皆壬午舉人之隱居著書終者

夏汝弼字叔直衡陽諸生湘衡亂佯狂遠蹈或歌或哭有語
及時事者卽閉目不答鼎革後挈家入九疑山絕粒死

周士儀字令公鄱人崇禎中拔貢父祉任常甯訓導罷官歸
爲潰卒所掠士儀泣求身代卒義而釋之遭亂不仕作史貫

十卷王夫之嘗亟稱之

陳三績字玉几零陵諸生事母孝與陳純德爲莫逆交純德貴遂絕意進取獻賊聞其名百方招之逃萬山中當事以抗節薦授桂林通判亦不赴隱雲莊山二十餘年著有易經傳義衷參山詩集學者稱參山先生

鄧林材字卉生新化諸生精步算占驗之學癸未獻賊之亂夜坐中庭仰視大叫曰長沙城陷矣柰何乃兄弟相約逃鼎革後隱於農

國朝康熙時吳逆踞衡州僞將軍某脅以官以計得免又有劉春萊字芝侶武岡諸生有要人欲物色之逼見於麟趾閣跳而避焉竟跛人呼爲跛仙

唐之正字光誠沅陵貢生御史愈賢之孫也初讀書雲盤山中既闔門歿於賊子身寓北溶寺甲申後盡去其髮如僧獨與同里沈汝霖遊詩集燬於火鄉人哀之爲築室北溶山頂曰南憩堂以終汝霖字他友

陸圻字麗京號講山錢塘貢生嘗束芻絮酒會葬婁東張溥之喪賦五言長律一時傳誦與弟行人培結友人爲登樓社號西陵體培盛氣難犯圻溫厚未嘗言人過有語及者輒曰我與汝姑自盡毋妄議他人培與陳潛夫以檄相攻止之不可則不與聞乙酉杭州不守培自經死圻匿海濱之越之閩薙髮爲僧母作書趣之歸乃以醫養親多奇驗有病入夢神告之曰汝病得九十六兩泥可生也旦告其友友悟曰此陸

圻先生也圻之字从斤从土姓爲六合之乃九十六兩土也
迎圻投之藥立已由是戶外屢恆滿未幾莊廷鑑私史禍作
牽連入獄貽書友人自刻責謂辱身對簿從此不敢與沙社
之列旣釋遂不知所之或言其在黃山子寅
步入山長跪號泣請歸圻曰昔以汝大母在耳今何所歸寅
請一祭墓乃相將歸會弟堦苦心痛劇甚留治八閱月與弟
同臥室不入內旣愈之廣東訪澹公於丹霞精舍一夕遁去
寅零丁走萬里求之莫能得踪跡遂悵悵以死時稱其孝云
汪颯字魏美錢塘人孤貧力學與人落落寡合人號曰汪冷
崇禎己卯舉人與同邑陸培齊名知府錢某以女妻之初盛
飾入門颯誠之乃屏侍婢以疏布躬操作南都亡奉母入天

台海上師起羣盜滿山復返錢塘僑寓北郭外室如懸罄處之宴如妻家欲強之試禮部出千金示其妻俾勸駕妻曰吾夫子不可勸吾亦不愛此金也當時湖上有三高士皆孝廉之不應試者而渢尤峻介我監司盧某聞其名欲見之一日遇渢於僧舍問汪孝廉何在渢應曰適在此今已去矣盧悵然而不知應者卽渢也已乃遣人通殷勤於三高士者約置酒湖舫以世外禮相見其二人幅巾抗禮盧相得深歡獨渢不至已知其在孤山放舟就之終排牆遁去渢不入城市當事或饋金爲壽不得卻埋之里貴人請銘墓饋百金拒弗納始居孤山遷大慈菴又遷寶名院竹榻蘆簾不避風雪恆出游或返或不返莫可蹤跡甯都魏禪自江西來訪渢謝弗見

禧遺書曰魏美足下甯都魏禧也欲與子握手一痛哭耳足
下以尋常游客拒之可謂失人風省書大驚一見歡若平生
臨別執手流涕風從愚菴和尚說世法禧曰子事愚菴謹豈
有意爲其弟子邪風曰吾甚敬愚菴然今之志士多爲釋氏
牽去此吾所以不肯也乙巳七月三十日卒於寶名僧舍年
四十八臨歿舉書卷焚之詩文無一存者起視日影曰可矣
書五言詩一章投筆就寢而逝兄澄弟澣亦諸生隱居終補
施相字贊伯號石農仁和諸生乙酉後棄衣巾築室西谿徙
居焉徐介萬斯選來依之三人所學不同而相得甚驩介性
孤梗諤諤多所否獨心服相四十年如一日相子雲蒸事介
如父無何介卒相父子適他出門人疑所殯雲蒸之婦曰徐

先生大故焉有不於正寢者盡出其簪珥以成禮相歸而喜曰不愧吾婦未幾相亦卒無以爲喪故人官守令者以百金致襚雲蒸曰是非吾先人意也再謝不受相遺書煨於火存詩一卷斯選嘗曰石農雖謝人事其心耿耿未下者傷曹檜之不振望西都之中興思深哉非田園之音也

徐繼恩字世臣仁和人宏光時舉明經首爲文刺譴臣之奸馬士英怒將逮之大行人陸培力爭之乃已後爲僧名靜挺字偃亭有十笏齋詩鈔

譚遷字仲木一字觀若海甯諸生嘗考累朝實錄撰國權一書中年燬於火晚克成編南都上景皇帝廟號曰代宗時以爲當遷獨非之答友人問詩云成周作諡法大小行乃傳公

且暨師望肇制自聖賢相古后皇陟南郊必稱天易名典克
慎敘法宜精專漢後避帝諱臨文率拘攣唐以代易世宋以
真易元其文雖或殊其義則一焉景皇承大業卽祚凡七年
多難固邦國文武要略全履遣奉迎使事兄禮固愆及平裕
陵返黃離位南偏初非因堯城奪門言何編梁瑤策始建張
懋冊用宣廟號猶未備何以垂簡編禮臣失不學代乃居世
先相越僅五世文義詎可沿謚說十五家秉禮恐不然盈廷
以爲是橫議臣談遷高宏圖張愼言皆以遷爲奇士折節下
之欲薦入史館不果宏圖之殉國也屬幼子於遷後遷走昌
平哭思陵將西哭愼言於陽城未至而卒時丙申歲也

巢鳴盛字端明嘉興人崇禎丙子舉人事母至孝亂後母歿

築室於墓顏其草堂曰永思閣曰止閣而自號止園三十年
跬步不離墓次絕跡城市念器物皆足誨盜種匏爲器遠近
效之謂之樵李尊有永思堂集海內三高士之一也卒年六
十七吳中徐枋爲定私謚曰貞孝先生又譚貞良字元孩崇
禎癸未進士其戚人朱彝尊嘗言其重爾山海正命不渝有
狷石居遺稿而褚連時者字青還諸生也朱彝尊謂其志士
不忘邱壑顧其詳均不可聞

吳統持字巨手嘉興諸生甲申之變將上書南都母黃氏止
之曰奸相竊柄汝欲何爲明年母卒棄諸生隱鴛湖坐臥一
危樓饘粥不繼尋賣卜四方年五十卒沈起字仲方亂後入
東禪寺爲僧非其好也嘗擬撰明書謂明不亡於流寇而亡

於厥衡斷自成化十二年秋始設西廡絕筆焉晚節以窮死
又布衣王翊字介人工詩詞天崇時詩歸盛行人沿竟陵派
翊獨尙唐音陳子龍擊節云今之高三十五也亂後餘小屋
二間炊爨吟詠其間故人有官府寮者造之不見尋卒於京
口無子二人亦嘉興人

馮延年字千秋秀水人祭酒  之孫也中錢塘藉崇禎己

卯副榜或勸其就庚辰特用榜之選延年知時不可爲遂歸
隱與子首川並著名復社著有秋月菴稿諸生俞汝言字右
吉亦有聲復社中亂後棄諸生博稽有明三百年典故作大
臣年表稱簡核晚著春秋平論取宋儒苛刻之論平反而解
釋之惜未流傳有大滌山房集又蔣之翘

承禮謹案原稿標
題江皋二字而傳

文則云之翹字楚穉竊疑有誤後讀朱彝尊明詩綜作蔣之翹當得實矣今據增蔣字江皋二字豈筆誤歟附志矣攷字楚穉秀水布衣甲申後隱於市營校刊楚詞晉書韓柳文集又輯樵李詩乘四十卷晚年無子書佚無存者

李標字子建嘉善人好言兵治軍律營陣壬遁諸書史可法辟爲記室見事不可爲辭歸里旣聞可法殉難揚州渡江會葬其衣冠於梅花嶺歸而遶屋種梅賦詩三十首蓋自託於西臺慟哭之謝參軍云

李天植字因仲平湖之乍浦鎮人學者稱蜃園先生海內三高士之一也崇禎癸酉舉於鄉少而蕭散嘗曰無欲則心清心清則識朗識朗則力堅無欲則心真心真則情摯情摯則氣厚時時以誨學者亦頗耽清言三上公車癸未其子諸生

觀卒自以爲有隱隱痛自刻責遂絕意仕進改名確字潛夫
海遭喪亂遣妾遣婢殆盡尙有田四十餘畝宅一區分畀所
後子震與其女遂髡髮別其妻逕入陳山足不至城市訓山
中童子以自給自署曰村學究老頭陀居山十年適山僧開
堂以避喧返其蜃園蜃園者乍浦勝地可以望海者也復與
妻居賣文取食妻爲樓輦竹筥以佐之好事者約爲月給供
米力辭不受有司慕其高訪之踰垣避又十年家益困不復
能保其園乃以妻委壻家而身寄食於僧寺戚友憐之相與
贖蜃園歸之於是復與妻居則年已七十矣相對時絕食乃
歎曰吾本爲長往之謀顧蠟屐未能乘桴又未能今悔之無
及待死而已有餽之食者非其人終不受或問以身後曰楊

王孫之葬何必棺也又十年蜃園但存二楹兩耳失聰苦下墜終日仰臥客至以粉版相問答江西魏禧來造其廬相對而泣臨別以銀五錢贈之五反不受固以請曰此非盜跖物也始納之禧屬侍郎曹溶廣糾同志爲繼粟之舉且謀身後事吳中徐枋聞之曰李先生不食人食聽其以餓死可矣旋使至則言果堅拒不受禧乃深以爲愧未幾竟餓死乍浦同時有鄭嬰垣者與天植稱金石交先數年於大雪中以凍死錢士馨一名𠵽字稚拙平湖貢生嘗曜金陵某妓欲挾之歸妓曰以君之才妾侍箕帚宜也恨讀書尙少願以異日士馨恥之歸假東湖僧舍以居夜讀昭明文選一沙彌前曰秀才年不爲少矣尙讀此兔園冊子邪益恥之發憤研究經史多

所撰述舊說周禮冬官散見五官之中士馨据大小戴記春秋內外傳以補之經生家以爲篤論晚入京師遇寇變著甲申傳信錄十卷頗不失實有廣笳集詩又陸啓滋字叔度亦平湖貢生性豪邁嘗大會詞人於金陵桃葉渡妓有呼延紅菊者曰今日之集惜無兩岸芙蕖啓滋乃復治具張讌客至則荷花盛開蓋先一日購百缸碎而沈之也自是十四樓中奉爲上客旣而走京師詩名藉甚遇亂歸里扼窮而死其友趙某誄之曰總君一身頓殊今昔翩翩五陵蕭蕭四壁金散名成人完代革聞者傷之

周之潛字敬可山陰人劉宗周弟子與宗周子洵同入山累受邏者之厄流離遷播每日死則俱死斷不負吾師以生旣

而薙髮令嚴相與披緇興福寺事定還家則田宅盡爲人奪至無棲止之處或勸之訟曰吾不忠不孝投死他鄉復何顏構獄與惡少對簿之潛本世勛籍初入宗周證人之社眾以爲左班官子弟忽之竟以苦節寄食沟所以死同邑張應鼇字莫夫亦宗周弟子服勤最久宗周官南都時邸舍蕭然應鼇獨侍側嘗作中興金鑑欲上之不果丙戌後講學山中久之卒

董瑒字元休會稽人初爲倪元璐弟子後更事劉宗周國變後披緇以壽終手輯劉子遺書又趙甸字禹功亦會稽人少極貧學菑養親人稱趙孝子長遊宗周之門傳其學丙戌後隱於淄賣畫自給世所稱壁林高士畫者也晚乃講學僻山

張應煜餘姚人劉宗周弟子當宗周誓死時勸擁諸藩起兵宗周謝以事不可爲曰然則此降城也亦非先生死所宗周瞿然起曰子言是也遽出城

劉應期字瑞當慈谿貢生劉宗周弟子也有聲復社中初與姜思睿齊名稱姜劉繼與馮文偉齊名稱劉馮丙戌後憂憤發於詩文多僻思與句鬱鬱死又同邑張成義字能信亦宗周弟子也丙戌後起兵不克行遁去不知所終

陳確字乾初海甯人好洛閩之學師事劉宗周與

下闕

葉敦艮字靜遠西安人劉宗周弟子也國變後棄諸生教於里塾能昌明宗周之學以篤行君子稱

戴易字南枝山陰人年七十餘猶能作徑丈八分書吳中高

士徐枋性孤峻闔戶不見一人特與易相得稱老友枋歿孀婦孤孫餽粥不繼謀葬於祖塋而族人不可易曰吾爲俟齋任此事一日不得則吾一日不了黧面繭足徬徨山谷中經年乃得地於鄧尉之西眞如塢價需三十金初求易八分書非其人多不應得者必厚酬至是榜於門一幅銀一錢銖積寸累悉歸之地不他費一錢寓無隔宿炊一蒼頭饑不能忍辭去己則寄食僧舍中語及徐先生必流涕事竟以集吳江潘耒爲作傳云易出處不可詳惟語操越音數稱劉念臺先生及酉戌間事云

張宗觀一名近道字用賓一字朗屋朱士稚字伯虎更字朗詣皆山陰人時號山陰二朗咸以管樂自命宗觀見詩人則

罵曰此雕蟲之徒也見士稚與人論詩亦罵不置二人既負
大志故與慈谿魏耕歸安錢纘曾長洲陳三島稱莫逆交聚
謀通海上破產結客士稚首爲人所發繫獄宗觀號呼於所
知斂貲賂獄吏得不死既論釋宗觀則大喜踴躍夜渡江爲
盜所殺然二朗實皆能詩樂府古風尤絕倫陳子龍詩有云
越國山川出霸才謂二朗也

陳洪綬字章侯諸暨人四歲就讀婦翁家塾翁方治舍堊壁
洪綬入視之良久自累案登之繪漢前將軍關侯像長十餘
尺翁見之驚且拜錢塘藍瑛工寫生洪綬嘗從學已而輕瑛
瑛亦自以爲不及曰此於畫蓋天授也已而縱酒近婦人或
數十日不沐客有求畫者雖罄折至恭勿與或置酒召妓輒

自索筆墨崇禎末入貲爲國子生魯監國時以畫待詔

王師下浙東大將軍固山某從圍城中搜得洪綬大喜令畫不畫刃迫之不畫以酒與婦人誘之畫久之請彙所畫署名乃大飲夜抱畫寢伺之則已遁矣旣乃混跡浮屠氏自稱老遲亦稱悔遲亦稱老蓮縱酒狎妓則如故醉後語及國家淪喪身世顛連輒慟哭不已後畫名逾重而意氣逾奇更數年以疾卒有妾曰吳淨髮亦工花草

邵以貫字得魯餘姚人門材最盛少與兄以發齊名性狷潔遭饑饉倡設義倉桑梓德之己國難大作幾欲死以母在不得遂髡髮爲頭陀狀走入雪竇山中妙高臺僧道巖者故鄞學官張廷賓也亦姚產乃依之苦身持力不與人接尋以省

母返故居時黃尊素季子名宗會者志節夙近來同居其潭
上園中相與夜讀謝皋羽遊錄輒慕之曰方今豺虎滿天下
五嶽之志不可期矣四明二百八十峯近在臥榻當使峯峰
有吾二人屐齒於是遍走山中然山寨方不靖所在多邏卒
二人者冠服奇古躑躅其間頻遭詰難不爲苦一日忽入絕
谷罔知所嚮俄而峯回路轉松梧桐竹甚盛有雞犬聲就之
祇一家有幅巾者出曰客從何來語之以宅里笑曰吾亦姚
人避世居此止二人宿曰是名石屋山僕爲陳從之嘗監故
大學士孫公嘉績軍公死海上吾無所依故來此耳因相顧
嗟歎曰是真桃源矣宗會嘗語人曰得魯自甲申後賴輔間
無日不有淚痕其稍開笑口者則遊山耳未幾宗會卒子然

無所嚮遂棄家投四明山中時尙有一妾不忍判亦自爲尼
偕隱山中之楊菴每日晨昏各上堂禮佛外此雖茗粥不相
通久之並卒

呂章成字裁之餘姚人大學士本之曾孫與陳函輝爲意氣
交函輝從魯監國於紹興薦章成爲翰林院待詔章成曰悍
將驕兵曰肆寇抄越城中顛躓狼狽救死不遑豈可爲之日
邪辭不赴函輝死章成走哭於台州意有所觸則惘惘獨行
欲得異人而友之訪戴易於鄧尉遇顧炎武於昌平已歷吳
齊燕越無所遇乃歸病中自燬其著述曰此無用之虛談也
所存有浴日樓集

周容字鄮山鄞人性跼弛不羈御史徐殿臣一見賞契由是

著名後殿臣避跡天童海寇掠之去容奔赴請以身質而遣
殿臣以餉贖既所許餉不償容受刑梏足爲之跛乘間竊歸
殿臣以爲慙而容無怨言踰年殿臣死詩哭之極哀論者高
之嘗舉鴻博不就楊秉紘字郊牧於推官文琦兄弟爲父行
同與江上之役而不受官文琦兄弟死秉紘以遺民領袖汐
社著述甚多而江浙水利攷尤關實用子早卒孫殤年踰八
十遭火盡焚其書偕老妻匍匐烈焰中不死歎曰我已無國
無家今又無書是天多我也因自號天多老人然神明不衰
自言得容膝地著述尙可記錄有延之課子者欣然往未設
帳而卒二人皆鄞諸生

周西字方人定海布衣也少喜讀書父母憐其孱弱節制之

西侯父母熟睡篝燈讀被蒙其影令勿洩久之被如墨有鄰婦挑之卻不與語婦慍曰真癡兒也丙戌江上師潰四年甫二十六歎曰楊鐵崖稱老寡婦今其時矣遂棄舉業授徒鄞之寶林以養母己亥朱成功之師掠鄞見西母豐碩以爲富家婦也火熏之西抱母大慟斫傷右手旁一卒曰是孝子也乞舍之得免著有勁草亭諸編痛定集皆不傳嘗與友人書曰今日所斷不可者妄以義士自欺也所謂義士者當爲陷海之魯連奮臂之陳涉張良之報讎翟義之討賊駱賓王之草檄謝枋得之卻聘否則陳咸之閉戶不出梅福之爲市卒陶潛之爲晉徵士如吾蛟川薛白瑜陳鴻賓艾仲可鄭調甫諸先生逃名空谷如疾風勁草老而逾壯庶幾古人年六十

八卒

范路字遵甫蘭谿人徙嘉興之梅會里好學工詩崇禎辛巳歲大饑人相食有族弟攜妻子將賣以求活者路留之同飯糠粃怡然不以爲嫌晚年賣藥長水市乍愚乍智人莫測其所詣門人私謚曰貞簡先生

路國挺字天植故諸暨人寄籍爲鄞諸生與華夏王家勤陸宇燭高宇泰風格相伯仲乙酉從錢肅樂起義破家輸餉戊子翻城之獄降紳謝三賓欲并殺之而帛書中無國挺名乃散流言謂國挺議事成後盡籍薦紳家以賞軍蓋激眾怒以殺之也遂被逮久之得脫家遂落柴門土室不接一客每歲值夏家勤忌日必致祭配以當年死事諸賢哭聲徹外邏舟

過之不爲怵嘗夜夢與張煌言相語荒亭木末間慟哭驚其鄰人因作寒厓紀夢詩憔悴三十年而卒

朱金芝字漢生亂後別署忍辱道人鄞人也朱氏以好古世其家藏鼎彝金石甚富金芝更喜講學從漳浦黃道周受三易洞璣之說復社諸人爭引重之甲申遇北都之難削髮南遜明年江上兵起以流滯他方不得與往來英霍山寨及太湖軍中遺書戚人推官董德欽邀之共事德欽答以海上之局勸金芝歸赴同讎市抵里而德欽以事洩死金芝不爲怵好事益甚未幾被捕亡命深山一日襍被長往叩所之曰吾將排閭闔故先訪三閭耳自是踪跡遂絕或曰客何騰蛟幕中或曰入滇中崎嶇扈從死或曰投鄖陽山中爲道士究莫

得而詳也

林浹字澹若閩人性任俠於詩畫六壬遁甲之學靡不究心甲中以武舉入都上請纓疏部議格不行未逾月而北都亡歸以岐黃術隱於市曾燦恆字惟閩侯官人南都御史熙丙孫隆武丙戌行選舉法與弟祖訓同列上薦閩亡不仕我閩中大吏將徵之乃裹糧遊吳越暮或徑宿林谷下自署曰江湖散民著有卽菴詩稿四卷遊草二卷楊維熊字乃武侯官人講學於鼇江幕浦三十年足跡不至城市著有周禮管子詳解尙書要言陳發曾字世承侯官諸生家鄰城西荔水莊亂後兀坐小樓憑欄吟嘯凡勝國之臣咸紀述之又有蔡又新者字在新亦侯官諸生亂後葺茅高隱二人詩文皆不傳

陳名賓字際五長樂廩生知縣夏允彝雅重之贈以詩亂後與子鳴瑜鳴琪築室松坪偕隱焉著有理學真偽論書經講述何其偉字梧子福清人中隆武丙戌舉人明亡隱居教授足跡不入城市自稱述民著有濤園別集又王廣福甯人好言天文隱居教授鄭芝龍兩徵以金卻不受著有易序及秦川四詠詩

鄭郊字牧仲莆田諸生博學能文黃道周嘗稱之曰鄭牧仲一日千里未易才也鼎革後迹跡壺山之南泉遂號南泉居士弟郊字奚仲亦諸生與郊齊名偕隱終身又有鄭邵者字勉仲與同邑劉堯章字陶九者俱卻聘隱山林以終蓋亦郊兄弟行也同時林炁字孟炁仙遊人尙書蘭友從子也博極

羣書而不與試嘗割股愈親疾有問及尙書當時事者輒悲涕不置對因自號曰默齋

朱國漢字爲章建甯人少孤事母以孝聞甲申間變狂走登故越王臺北北向慟哭焚素業挾貲遊吳越燕趙荆豫與傭僧共甘苦所至遇古忠臣名賢祠廟墟墓歌詩憑弔有騷人之遺意與同邑丁之賢有綏安二布衣詩鈔蕭山毛奇齡爲之序云之賢字德舉崇禎時挾策入都欲獻書闕下言兵事不果北都陷念家有老母脫身南下有王將軍者建牙汀州招致幕下復稍稍資給之贈以婢生一子僦屋城東桃花溪上以卒

阮文錫字疇生同安人功臣某之後也世居海上幼孤泛海

學賈以養母母歿躬負土石與父合葬鷺門甲申國變文錫
方弱冠慨然謝舉子業師事峽江曾櫻傳心性之學又講習
風雅旁及道藏釋典兵法醫卜方伎之書靡不淹貫出覽名
山大川北抵東華託處十餘年後乃逃於釋氏名超全以教
授生徒自給論者謂是鄭所南謝舉羽之流著有夕陽寮存
稿年八十餘卒

林霍字子濩號滄湄亦同安人好等韻之學問詩於盧若騰
徐孚遠自丙戌秋往來虎溪鶴嶺間與紀許國稱莫逆交欲
師事之許國曰某不敢擁皋比如黃魯直之於子瞻少游足
矣相期許如此稱遺民終身著有雙聲譜續閩書滄湄文集
鷗亭詩草又同邑莊潛字伏之紀文疇弟子與紀許國林霍

扁舟放歌嘗編纂宏光逸事繼以詩歌名爲石函錄許國爲之序

洪承峻南安諸生我太傅承疇之季弟也工詩文善草書婉挺迥縱時人目爲龍蛇字我

朝授以官屢辭不赴承疇不能強也又陳顯謨晉江諸生與同邑進士黃道景善北都陷道景投水死顯謨入文廟自經遇救不死乃終身杜門謝客

葉后詔廈門諸生甲申以歲貢入京遇國變歸以詩酒自娛與徐孚遠鄭郊輩爲方外七友後渡臺灣著鷓草五經講義行世張士柳惠安人八歲爲諸生中崇禎癸酉副榜閩事敗避難浯廈漳澄間晚渡臺灣杜門以書史自娛辟穀三年惟

食菜果卒年九十九

涂伯案字虞卿弟仲吉字德公漳州鎮海衛人通政一榛子也一榛與東林顧憲成遊三疏詆湯賓尹故訶黨人者必及一榛天啓中引疾歸未幾緹騎四出一榛家居有戒心伯案色養以孝聞璫敗一榛已先卒新建徐世溥致書伯案曰昔歐蘇以黨人蹟不用叔黨叔弼僅文墨守父訓范文正之子乃能承父志耳今在虞卿矣黃道周逮詔獄廷杖申救者皆獲罪仲吉以太學生上書謂道周一生學問只知君親雖言嘗過戇而志實忠純昔唐宗不殺魏徵漢武優容汲黯皇上遠法堯舜奈何出漢唐主下崇禎帝大怒予杖下獄問者究主使仲吉曰此豈客人主使可剖吾肝呈至尊以明道周之

無罪竟遣戍然語微聞於帝頗心動壬午伯案舉於鄉而仲吉亦自戍所釋歸甲申變聞兄弟謀舉勤王師當事者不之許及隆武帝駐蹕天興授仲吉御史并徵伯案謝不往語弟曰上不駐足荆南動四方勤王之師乃退守閩中羈旅溫鐸之手乾符廣明之事不遠矣吾何望哉聞事敗仲吉祝髮於廈門鬱鬱嘔血卒伯案乃棲止文山之陽蒐羅舊聞詳具君臣行事本末以推見治亂所由其大者留史授命錄留史者言遼事授命錄則兩都殉節之臣其略曰崇禎甲申乾坤崩裂天子殉國一時朝紳魚貫稽首出就寇廷蓋白石勒侯景而降祿山朱泚而上未有辱於斯者在內決志者二十餘人在外死綏者四人嗚呼國家二百七十年歲具馬幣聘名士

所以蓄士大夫者道甚隆遜志而後僅見此數君子邪乙酉之變天子棄其母大臣棄其君吏棄其疆民棄其髮乾坤一大變也竟此寂寂無爲唐之舞馬諸伶抑掄地下乎劉黃諸公向中朝所指爲黨人者不忍視其國之亡嘯狡童之歌作辨亡之論也皎哉與日月爭光矣若夫處於牆陰不掛朝籍柴市止水羞肩齊驅是亦貴於皋禹壽於彭鏗也旣而里門被屠所著書悉燬於火又迫遷界之令流寓吳興嘗太息謂其子曰吾父子兄弟以文章起家思以節義挽回天下吾痛夫家國之禍其始也以封疆爲起釁之地其終也以封疆爲報復之私其始也議戰戰不足而議守其終也守不足而議款其始也闔官礦稅而釀戎禍常侍漸且典兵其終也戎寇

交訐而用宦官軍容遂陵邊帥其始也朱穆發疽於侯覽魯公爭坐於朝恩其終也子弟悉合乎黃巾禁鑰竟開於綠幘其始也以一隅騷天下召募加派歲彌以甚其終也騷天下而亂天下膚剝復潰大命以傾夫宦官小人陰類也相因而至易重垢復春秋嚴夷夏詳哉其言之矣誰生厲階至今爲梗吾於光熹以來是非終始瞭若觀火今悉燬於兵他日舉三十年事疑以傳疑舜纂尹誅幾何不爲東野之語汲之冢也悲夫晚客死浦城門人問後事無一語但曰只此便是太極端坐而逝甯化李世熊爲表其墓焉

李茂春字正青龍溪人隆武丙戌舉人風神秀整跣足岸幘旁若無人壬寅

王師克厦門偕盧若騰郭貞一渡臺灣題其茅亭曰夢蝶處
日誦佛經人稱李菩薩云又洪思字阿士亦龍溪人年十三
隨父遊黃道周之門容止甚飭道周器之道周旣歿逃於敬
身山不入城市詩歌自放時買舟過江東登鄴山撫道周墓
哭而去

王仍輅字載卿漳浦人侍郎志道之孫丙戌閩亡後逃於丹
山從張士楷遊每登山巔望遠海涕纍纍下貴人某者姑丈
人行也餌以千金不顧敝衣冠率妻子入珠溪萬山中暮年
還舊址置一笠爲亭四面編蘆障之竟老其中程之正號亦
奇亦漳浦廩生端方不苟鼎革後赴文廟拜辭衣巾徜徉山
水以終老焉

黃驥陞字陟甫漳浦人大學士道周之從子行也天資醇篤讀書數百遍乃成誦誦卽焚之終身不忘與同里林蘭友爲莫逆交舉天啓甲子鄉試北都陷與蘭友抗賊南旋久之入海偕徐孚遠諸人放浪憑弔以卒從弟寅陞字弼甫爲邑諸生兄弟相師友驥陞入海寅陞亦祝髮隱於楓亭之程厝鄉號楓溪退士

林邁佳字子篤詔安人潛心力學從薛欽字黃道周遊著環中一貫圖說究論天人事物之蘊薛以一菴子呼之晚歲以學行舉棲隱不出又陳國腆字非石海澄人崇禎中貢士未殿試歸隱漳上蒼園不履城市大吏舉薦皆峻辭免

邱義字明大甯化諸生少慧敏輒折其塾師旣師族諸生邱

根根偕之謁其師同邑李世熊世熊奇之引爲忘年交隆武帝建號設科義謂世熊曰此時以八比進身譬操蘆葦代犁鋤墾闢無日矣聞敗我

大清命學使者試汀父強之就試義文入宗廟邱墟鼎社遷改荼毒攢心無天可訴等語盛觸忌諱免責除名先是乙酉歲田仰兵潰掠甯化義妻謝氏罵賊死順治間邑令鄒某將請旌於

朝義力卻之父故嗜飲家益落義能曲承之善事後母以撫輯諸弟子四人皆課讀經史顧不許其應試曰讀書所以立身試則鬻身吾雖貧不鬻其子也嘗題壁曰久懸松膽辭春媚獨愛梅花感雪恩年未五十而卒

小腆紀傳卷第五十八終

男承禮編輯

仁和魏錫曾參校
會稽梁繼元覆校